

Studiantenan activo na Museo Arkeologico Nacional Aruba



ORANJESTAD - Siman pasa diahuebs y diabierna mainta Museo Arkeologico Nacional Aruba a ricibi e prome scol cu a participa na e programa educativo di e exposicion temporario Rancho. E mesun diahuebs, dia 18 di November ultimo, Museo tambe a duna un guia den sala di exposicion permanente na studiantenan di Universidad Aruba, sigui pa un 'gastcollege' den auditorium.

Parti riba 2 dia, alumnonan di Paso pa Futuro a participa na e programa educativo di e exposicion temporario Rancho, desaroya pa Kees de Jong y Melisa Richardson, encarga cu programanan educativo y vacacional di e expo Rancho. Despues di un introduccion cortico a haci un quiz den e sala di exposicion na unda e hobennan a rondia e contestanan. A clausura e programa cu un actividad creativo na unda e alumnonan a diseña un adorno pa Pasco inspira pa e informacion haya di "Rancho".

Di esaki a scoge e adornonan mas resaltante, cual lo uza pa traha adornonan cu lo ser duplica y parti na e scolnan den vecindario pa laga alumnonan dorna esakinan. E adornonan aki lo ser colga den un 'kerstboom' cu lo ser poni dilanti di Museo pa un celebracion di Pasco.

Den colaboracion cu Universidad di Aruba, drs. Arkeologo Raymundo



Dijkhoff a duna un gastcollege cual tabata forma un parti di e modulo 'Social and Cultural Fundamentals of Aruba' y tabata tin como tema 'Discovering the roots of Aruba by means of the science of Archaeology'. Como parti di nan 'fieldtrip' na Museo e studiantenan a haya un guia den sala di exposicion. Despues tabata tin algun tempo pa nan mes studia e exposicion como preparacion riba e 'gastcollege' titula "Un introduccion den Arkeologia di Aruba". Tanto e programa

educativo pa scol como e bishita di Universidad tabata hopi exitoso.

E programa educativo tanto como e publicacionnan cu ta pertenece na e programa ta danki na e sosten financiero di CEDE Aruba. Scolnan secundario cu ta interesa pa participa na e programa di "Rancho" of ta desea di haya mas informacion tocante e programa aki por tuma contacto Suzy Boekhoudt of Marguerita Wever na tel. 5828979.